

## 2 Kurinthyon

<sup>1</sup> Yih khat Paulus kī taraf se hai, jo Allāh kī marzī se Masīh Īsā kā rasūl hai. Sāth hī yih bhāi Tīmuthiyus kī taraf se bhī hai.

Maini Kurinthus meñ Allāh kī jamāt aur sūbā Aḳhayā meñ maujūd tamām muqaddasīn ko yih likh rahā hūñ.

<sup>2</sup> Ḳhudā hamārā Bāp aur Ḳhudāwand Īsā Masīh āp ko fazl aur salāmatī atā karen.

### *Allāh kī Hamd-o-Sanā*

<sup>3</sup> Hamāre Ḳhudāwand Īsā Masīh ke Ḳhudā aur Bāp kī tamjīd ho, jo rahm kā Bāp aur tamām tarah kī tasallī kā Ḳhudā hai.

<sup>4</sup> Jab bhī ham musībat meñ phañs jāte haiñ to wuh hameñ tasallī detā hai tāki ham auron ko bhī tasallī de sakeñ. Phir jab wuh kisī musībat se dochār hote haiñ to ham bhī un ko usī tarah tasallī de sakte haiñ jis tarah Allāh ne hameñ tasallī dī hai.

<sup>5</sup> Kyoñki jītnī kasrat se Masīh kī-sī musībateñ ham par ā jātī haiñ utnī kasrat se Allāh Masīh ke zariye hameñ tasallī detā hai.

<sup>6</sup> Jab ham musībatoñ se dochār hote haiñ to yih bāt āp kī tasallī aur najāt kā bāis bantī hai. Jab hamārī tasallī hotī hai to yih āp kī bhī tasallī kā bāis bantī hai. Yoñ āp bhī sabar se wuh kuchh bardāsht karne ke qābil ban jāte haiñ jo ham bardāsht kar rahe haiñ.

<sup>7</sup> Chunāñche hamārī āp ke bāre meñ ummīd puḳhtā rahtī hai. Kyoñki ham jānte haiñ ki jis

tarah āp hamārī musībaton meñ sharīk haiñ usī tarah āp us tasallī meñ bhī sharīk haiñ jo hameñ hāsīl hotī hai.

<sup>8</sup> Bhāiyo, ham āp ko us musībat se āgāh karnā chāhte haiñ jis meñ ham sūbā Āsiyā meñ phañs gae. Ham par dabāw itnā shadīd thā ki use bardāsht karnā nāmumkin-sā ho gayā aur ham jān se hāth dho baiṭhe.

<sup>9</sup> Ham ne maḥsūs kiyā ki hameñ sazā-e-maut dī gāī hai. Lekin yih is lie huā tāki ham apne āp par bharosā na karen balki Allāh par jo murdoñ ko zindā kar detā hai.

<sup>10</sup> Usī ne hameñ aisī haibatnāk maut se bachāyā aur wuh āindā bhī hameñ bachāegā. Aur ham ne us par ummīd rakhī hai ki wuh hameñ ek bār phir bachāegā.

<sup>11</sup> Āp bhī apnī duāon se hamārī madad kar rahe haiñ. Yih kitnī ḳhūbsūrat bāt hai ki Allāh bahutoñ kī duāon ko sun kar ham par mehrbānī karegā aur natīje meñ bahutere hamāre lie shukr kareñge.

### *Paulus ke Mansūboñ meñ Tabdīlī*

<sup>12</sup> Yih bāt hamāre lie faḳhr kā bāis hai ki hamārā zamīr sāf hai. Kyoñki ham ne Allāh ke sāmne sādādilī aur ḳhulūs se zindagī guzārī hai, aur ham ne apnī insānī hikmat par inḥisār nahīn kiyā balki Allāh ke fazl par. Duniyā meñ aur ḳhāskar āp ke sāth hamārā rawaiyā aisā hī rahā hai.

<sup>13</sup> Ham to āp ko aisī koī bāt nahīn likhte jo āp parḥ yā samajh nahīn sakte. Aur mujhe ummīd hai ki āp ko pūre taur par samajh āegī,

<sup>14</sup> agarche āp filhāl sab kuchh nahīn samajhte. Kyoñki jab āp ko sab kuchh samajh āegā tab āp Ḳhudāwand Īsā ke din ham par utnā faḡhr kar sakeñge jitnā ham āp par.

<sup>15</sup> Chūñki mujhe is kā pūrā yaqīn thā is lie main pahle āp ke pās ānā chāhtā thā tāki āp ko dugnī barkat mil jāe.

<sup>16</sup> Ḳhayāl yih thā ki main āp ke hān se ho kar Makiduniyā jāūñ aur wahāñ se āp ke pās wāpas āūñ. Phir āp sūbā Yahūdiyā ke safr ke lie taiyāriyāñ karne meñ merī madad karke mujhe āge bhej sakte the.

<sup>17</sup> Āp mujhe batāeñ ki kyā main ne yih mansūbā yoñ hī banāyā thā? Kyā main duniyāwī logoñ kī tarah mansūbe banā letā hūñ jo ek hī lamhe meñ “Jī hāñ” aur “Jī nahīn” kahte haiñ?

<sup>18</sup> Lekin Allāh wafādār hai aur wuh merā gawāh hai ki ham āp ke sāth bāt karte waqt “Nahīn” ko “Hāñ” ke sāth nahīn milāte.

<sup>19</sup> Kyoñki Allāh kā Farzand Īsā Masīh jis kī munādī main, Silās aur Tīmuthiyus ne kī wuh bhī aiśā nahīn hai. Us ne kabhī bhī “Hāñ” ko “Nahīn” ke sāth nahīn milāyā balki us meñ Allāh kī hatmī “Jī hāñ” wujūd meñ āī.

<sup>20</sup> Kyoñki wuhī Allāh ke tamām wādoñ kī “Hāñ” hai. Is lie ham usī ke wasīle se “Āmīn” (Jī hāñ) kah kar Allāh ko jalāl dete haiñ.

<sup>21</sup> Aur Allāh Ḳhud hameñ aur āp ko Masīh meñ mazbūt kar detā hai. Usī ne hameñ masah karke maḡhsūs kiyā hai.

<sup>22</sup> Usī ne ham par apnī muhr lagā kar zāhir kiyā hai ki ham us kī milkiyat haiñ aur usī ne hameñ Rūhul-quds de kar apne wādoñ kā

bayānā adā kiyā hai.

<sup>23</sup> Agar maiñ jhūṭ bolūñ to Allāh mere ḳhilāf gawāhī de. Bāt yih hai ki maiñ āp ko bachāne ke lie Kurinthus wāpas na āyā.

<sup>24</sup> Matlab yih nahīñ ki ham īmān ke muāmale meñ āp par hukūmat karnā chāhte haiñ. Nahīñ, ham āp ke sāth mil kar ḳhidmat karte haiñ tāki āp ḳhushī se bhar jāeñ, kyoñki āp to īmān kī mārīfat qāym haiñ.

## 2

<sup>1</sup> Chunāñche maiñ ne faislā kiyā ki maiñ dubārā āp ke pās nahīñ āūngā, warnā āp ko bahut ḡham khānā paṛegā.

<sup>2</sup> Kyoñki agar maiñ āp ko dukh pahuñchāūñ to kaun mujhe ḳhush karegā? Yih wuh shaḳhs nahīñ karegā jise maiñ ne dukh pahuñchāyā hai.

<sup>3</sup> Yihī wajah hai ki maiñ ne āp ko yih likh diyā. Maiñ nahīñ chāhtā thā ki āp ke pās ā kar unhīñ logon se ḡham khāūñ jinheñ mujhe ḳhush karnā chāhie. Kyoñki mujhe āp sab ke bāre meñ yaqīn hai ki merī ḳhushī āp sab kī ḳhushī hai.

<sup>4</sup> Maiñ ne āp ko nihāyat ranjīdā aur pareshān hālat meñ ānsū bahā bahā kar likh diyā. Maqsad yih nahīñ thā ki āp ḡhamgīn ho jāeñ balki maiñ chāhtā thā ki āp jān leñ ki maiñ āp se kitnī gahrī muhabbat rakhtā hūñ.

### *Mujrīm ko Muāf Kar Diyā Jāe*

<sup>5</sup> Agar kisī ne dukh pahuñchāyā hai to mujhe nahīñ balki kisī had tak āp sab ko. (Maiñ zyādā saḳhtī se bāt nahīñ karnā chāhtā.)

<sup>6</sup> Lekin mazkūrā shaḡhs ke lie yih kāfī hai ki use jamāt ke aksar logoñ ne sazā dī hai.

<sup>7</sup> Ab zarūrī hai ki āp use muāf karke tasallī deñ, warnā wuh ḡham khā khā kar tabāh ho jāegā.

<sup>8</sup> Chunāñche main is par zor denā chāhtā hūñ ki āp use apnī muhabbat kā ehsās dilāeñ.

<sup>9</sup> Main ne yih mālūm karne ke lie āp ko likhā ki kyā āp imtihān meñ pūre utreñge aur har bāt meñ tābe raheñge.

<sup>10</sup> Jise āp kuchh muāf karte haiñ use main bhī muāf kartā hūñ. Aur jo kuchh main ne muāf kiyā, agar mujhe kuchh muāf karne kī zarūrat thī, wuh main ne āp kī ḡhātir Masīh ke huzūr muāf kiyā hai

<sup>11</sup> tāki Iblīs ham se fāydā na uṡhāe. Kyonki ham us kī chāloñ se ḡhūb wāqif haiñ.

### *Troās meñ Paulus kī Pareshānī*

<sup>12</sup> Jab main Masīh kī ḡhushḡhabrī sunāne ke lie Troās gayā to ḡhudāwand ne mere lie āge ḡhidmat karne kā ek darwāzā khol diyā.

<sup>13</sup> Lekin jab mujhe apnā bhāī Titus wahāñ na milā to main bechāñ ho gayā aur unheñ ḡhairbād kah kar sūbā Makiduniyā chalā gayā.

### *Masīh meñ Fatah*

<sup>14</sup> Lekin ḡhudā kā shukr hai! Wuhī hamāre āge āge chāltā hai aur ham Masīh ke qaidī ban kar us kī fatah manāte hue us ke pīchhe pīchhe chalte haiñ. Yoñ Allāh hamāre wasīle se har jagah Masīh ke bāre meñ ilm ḡhushbū kī tarah phailātā hai.

<sup>15</sup> Kyoñki ham Masīh kī ḡhushbū haiñ jo Allāh tak pahuñchtī hai aur sāth sāth logon meñ bhī phailtī hai, najāt pāne wālon meñ bhī aur halāk hone wālon meñ bhī.

<sup>16</sup> Bāz logon ke lie ham maut kī mohlak bū haiñ jabki bāz ke lie ham zindagibāḡhsh ḡhushbū haiñ. To kaun yih zimmedārī nibhāne ke lāyq hai?

<sup>17</sup> Kyoñki ham aksar logon kī tarah Allāh ke kalām kī tijārat nahīn karte, balki yih jān kar ki ham Allāh ke huzūr meñ haiñ aur us ke bheje hue haiñ ham ḡhulūsdilī se logon se bāt karte haiñ.

### 3

#### *Nae Ahd ke Ḳhādim*

<sup>1</sup> Kyā ham dubārā apnī ḡhūbiyon kā ḡhandorā pīṭ rahe haiñ? Yā kyā ham bāz logon kī mānind haiñ jinheñ āp ko sifārishī ḡhat dene yā āp se aise ḡhat likhwāne kī zarūrat hotī hai?

<sup>2</sup> Nahīn, āp to ḡhud hamārā ḡhat haiñ jo hamāre dilon par likhā huā hai. Sab ise pahchān aur paṛh sakte haiñ.

<sup>3</sup> Yih sāf zāhir hai ki āp Masīh kā ḡhat haiñ jo us ne hamārī ḡhidmat ke zariye likh diyā hai. Aur yih ḡhat siyāhī se nahīn balki zindā Ḳhudā ke Rūh se likhā gayā, patthar kī taḡhtiyon par nahīn balki insānī dilon par.

<sup>4</sup> Ham yih is lie yaqīn se kah sakte haiñ kyoñki ham Masīh ke wasīle se Allāh par etamād rakhte haiñ.

<sup>5</sup> Hamāre andar to kuchh nahīn hai jis kī binā par ham dāwā kar sakte ki ham yih kām karne ke

lāyq haiñ. Nahīñ, hamārī liyāqat Allāh kī taraf se hai.

<sup>6</sup> Usī ne hameñ nae ahd ke khādim hone ke lāyq banā diyā hai. Aur yih ahd likhī huī shariyat par mabnī nahīñ hai balki Rūh par, kyonki likhī huī shariyat ke asar se ham mar jāte haiñ jabki Rūh hameñ zindā kar detā hai.

<sup>7</sup> Shariyat ke hurūf patthar kī takhtiyon par kandā kie gae aur jab use diyā gayā to Allāh kā jalāl zāhir huā. Yih jalāl itnā tez thā ki Isrāīlī Mūsā ke chehre ko lagātār dekh na sake. Agar us chīz kā jalāl itnā tez thā jo ab mansūkh hai

<sup>8</sup> to kyā Rūh ke nizām kā jalāl is se kahīñ zyādā nahīñ hogā?

<sup>9</sup> Agar purānā nizām jo hameñ mujrim thahrātā thā jalālī thā to phir nayā nizām jo hameñ rāstbāz qarār detā hai kahīñ zyādā jalālī hogā.

<sup>10</sup> Hāñ, pahle nizām kā jalāl nae nizām ke zabardast jalāl kī nisbat kuchh bhī nahīñ hai.

<sup>11</sup> Aur agar us purāne nizām kā jalāl bahut thā jo ab mansūkh hai to phir us nae nizām kā jalāl kahīñ zyādā hogā jo qāym rahegā.

<sup>12</sup> Pas chūñki ham aisī ummīd rakhte haiñ is lie baṛī dilerī se khidmat karte haiñ.

<sup>13</sup> Ham Mūsā kī mānind nahīñ haiñ jis ne shariyat sunāne ke ikhtitām par apne chehre par niqāb ḍāl liyā tāki Isrāīlī use takte na raheñ jo ab mansūkh hai.

<sup>14</sup> To bhī wuh zahnī taur par aṛ gae. Kyonki āj tak jab purāne ahdnāme kī tilāwat kī jāti hai to yihī niqāb qāym hai. Āj tak niqāb ko

haṭāyā nahīn gayā kyonki yih ahd sirf Masīh men mansūkh hotā hai.

<sup>15</sup> Hān, āj tak jab Mūsā kī shariyat parhī jāti hai to yih niqāb un ke dilon par parā rahtā hai.

<sup>16</sup> Lekin jab bhī koī Kḥudāwand kī taraf rujū kartā hai to yih niqāb haṭāyā jātā hai,

<sup>17</sup> kyonki Kḥudāwand Rūh hai aur jahān Kḥudāwand kā Rūh hai wahān āzādī hai.

<sup>18</sup> Chunānche ham sab jin ke chehon se niqāb haṭāyā gayā hai Kḥudāwand kā jalāl mun'akis karte aur qadam baqadam jalāl pāte hue Masīh kī sūrat men badalte jāte haiñ. Yih Kḥudāwand hī kā kām hai jo Rūh hai.

## 4

### *Miṭṭī ke Bartanon men Ruhānī Kḥazānā*

<sup>1</sup> Pas chūnki hameñ Allāh ke rahm se yih kḥidmat sauñpī gaī hai is lie ham bedil nahīn ho jāte.

<sup>2</sup> Ham ne chhupī huī sharmnāk bāteñ mustarad kar dī haiñ. Na ham chālākī se kām karte, na Allāh ke kalām men tahrif karte haiñ. Balki hameñ apnī sifārish kī zarūrat bhī nahīn, kyonki jab ham Allāh ke huzūr logon par haqīqat ko zāhir karte haiñ to hamārī neknāmī kḥud baḥud har ek ke zamīr par zāhir ho jāti hai.

<sup>3</sup> Aur agar hamārī kḥushkhabrī niqāb tale chhupī huī bhī ho to wuh sirf un ke lie chhupī huī hai jo halāk ho rahe haiñ.

<sup>4</sup> Is jahān ke sharir Kḥudā ne un ke zahnon ko andhā kar diyā hai jo imān nahīn rakhte. Is lie wuh Allāh kī kḥushkhabrī kī jalālī raushnī nahīn dekh sakte. Wuh yih paighām nahīn samajh



sakte jo Masīh ke jalāl ke bāre meñ hai, us ke bāre meñ jo Allāh kī sūrat hai.

<sup>5</sup> Kyoñki ham apnā prachār nahīn karte balki Īsā Masīh kā paighām sunāte haiñ ki wuh Ḳhudāwand hai. Apne āp ko ham Īsā kī ḳhātir āp ke ḳhādīm qarār dete haiñ.

<sup>6</sup> Kyoñki jis Ḳhudā ne farmāyā, “Andhere meñ se raushnī chamke,” us ne hamāre diloñ meñ apnī raushnī chamakne dī tāki ham Allāh kā wuh jalāl jān leñ jo Īsā Masīh ke chehre se chamaktā hai.

<sup>7</sup> Lekin ham jin ke andar yih ḳhazānā hai ām miṭṭī ke bartanoñ kī mānind haiñ tāki zāhir ho ki yih zabardast quwwat hamārī taraf se nahīn balki Allāh kī taraf se hai.

<sup>8</sup> Log hameñ chāroñ taraf se dabāte haiñ, lekin koī hameñ kuchal kar ḳhatm nahīn kar saktā. Ham uljhan meñ paṛ jāte haiñ, lekin ummīd kā dāman hāth se jāne nahīn dete.

<sup>9</sup> Log hameñ izā dete haiñ, lekin hameñ akelā nahīn chhoṛā jātā. Logoñ ke dhakkoñ se ham zamīn par gir jāte haiñ, lekin ham tabāh nahīn hote.

<sup>10</sup> Har waqt ham apne badan meñ Īsā kī maut lie phirte haiñ tāki Īsā kī zindagī bhī hamāre badan meñ zāhir ho jāe.

<sup>11</sup> Kyoñki har waqt hameñ zindā hālat meñ Īsā kī ḳhātir maut ke hawāle kar diyā jātā hai tāki us kī zindagī hamāre fānī badan meñ zāhir ho jāe.

<sup>12</sup> Yoñ ham meñ maut kā asar kām kartā hai jabki āp meñ zindagī kā asar.

<sup>13</sup> Kalām-e-muqaddas meñ likhā hai, “Main

īmān lāyā aur is lie bolā.” Hamen īmān kā yihī Rūh hāsīl hai is lie ham bhī īmān lāne kī wajah se bolte haiñ.

<sup>14</sup> Kyoñki ham jānte haiñ ki jis ne Ḳhudāwand Īsā ko murdoñ meñ se zindā kar diyā hai wuh Īsā ke sāth hamen bhī zindā karke āp logoñ samet apne huzūr kharā karegā.

<sup>15</sup> Yih sab kuchh āp ke fāyde ke lie hai. Yoñ Allāh kā fazl āge baṛhte baṛhte mazīd bahut-se logoñ tak pahuñch rahā hai aur natīje meñ wuh Allāh ko jalāl de kar shukrguzārī kī duāoñ meñ bahut izāfā kar rahe haiñ.

### *Īmān kī Zindagī*

<sup>16</sup> Isī wajah se ham bedil nahīñ ho jāte. Beshak zāhirī taur par ham khatm ho rahe haiñ, lekin andar hī andar roz baroz hamārī tajdīd hotī jā rahī hai.

<sup>17</sup> Kyoñki hamārī maujūdā musībat halkī aur pal-bhar kī hai, aur wuh hamāre lie ek aisā abadī jalāl paidā kar rahī hai jis kī nisbat maujūdā musībat kuchh bhī nahīñ.

<sup>18</sup> Is lie ham dekhī huī chīzoñ par ghaur nahīñ karte balki andekhī chīzoñ par. Kyoñki dekhī huī chīzeñ ārizī haiñ, jabki andekhī chīzeñ abadī haiñ.

## 5

<sup>1</sup> Ham to jānte haiñ ki jab hamārī duniyāwī jhoñpṛī jis meñ ham rahte haiñ girāī jāegī to Allāh hamen āsmān par ek makān degā, ek aisā abadī ghar jise insānī hāthoñ ne nahīñ banāyā hogā.

<sup>2</sup> Is lie ham is jhoṅprī meñ karāhte haiñ aur āsmānī ghar pahan lene kī shadīd ārzū rakhte haiñ,

<sup>3</sup> kyonki jab ham use pahan leñge to ham nange nahīñ pāe jāeñge.

<sup>4</sup> Is jhoṅprī meñ rahte hue ham bojh tale karāhte haiñ. Kyonki ham apnā fānī libās utārnā nahīñ chāhte balki us par āsmānī ghar kā libās pahan lenā chāhte haiñ tāki zindagī wuh kuchh nigal jāe jo fānī hai.

<sup>5</sup> Allāh ne ḳhud hameñ is maqsad ke lie taiyār kiyā hai aur usī ne hameñ Rūhul-quḏs ko āne wāle jalāl ke baiāne ke taur par de diyā hai.

<sup>6</sup> Chunāñche ham hameshā hauslā rakhte haiñ. Ham jānte haiñ ki jab tak apne badan meñ rihāishpazīr haiñ us waqt tak Ḳhudāwand ke ghar se dūr haiñ.

<sup>7</sup> Ham zāhirī chīzoñ par bharosā nahīñ karte balki īmān par chalte haiñ.

<sup>8</sup> Hāñ, hamārā hauslā buland hai balki ham zyādā yīh chāhte haiñ ki apne jismānī ghar se rawānā ho kar Ḳhudāwand ke ghar meñ raheñ.

<sup>9</sup> Lekin ḳhāh ham apne badan meñ hoñ yā na, ham isī koshish meñ rahte haiñ ki Ḳhudāwand ko pasand aeñ.

<sup>10</sup> Kyonki lāzim hai ki ham sab Masīh ke taḳht-e-adālat ke sāmne hāzir ho jāeñ. Wahāñ har ek ko us kām kā ajr milegā jo us ne apne badan meñ rahte hue kiyā hai, ḳhāh wuh achchhā thā yā burā.

*Masīh ke wasīle se Hamārī Allāh ke sāth Dostī*

<sup>11</sup> Ab ham Ḳhudāwand ke ḳhauf ko jān kar logon ko samjhāne kī koshish karte haiñ. Ham

to Allāh ke sāmne pūre taur par zāhir haiñ. Aur main ummīd rakhtā hūñ ki ham āp ke zamīr ke sāmne bhī zāhir haiñ.

<sup>12</sup> Kyā ham yih bāt karke dubārā apnī sifārish kar rahe haiñ? Nahīn, āp ko ham par faḡhr karne kā mauqā de rahe haiñ tāki āp un ke jawāb meñ kuchh kah sakeñ jo zāhirī bātoñ par sheḡhī mārte aur dilī bāteñ nazarandāz karte haiñ.

<sup>13</sup> Kyoñki agar ham beḡhud hue to Allāh kī ḡhātīr, aur agar hosh meñ haiñ to āp kī ḡhātīr.

<sup>14</sup> Bāt yih hai ki Masīh kī muhabbat hameñ majbūr kar detī hai, kyoñki ham is natīje par pahuñch gae haiñ ki ek sab ke lie muā. Is kā matlab hai ki sab hī mar gae haiñ.

<sup>15</sup> Aur wuh sab ke lie is lie muā tāki jo zindā haiñ wuh apne lie na jieñ balki us ke lie jo un kī ḡhātīr muā aur phir jī uṡhā.

<sup>16</sup> Is wajah se ham ab se kisī ko bhī duniyāwī nigāh se nahīn deḡhte. Pahle to ham Masīh ko bhī is zāwiye se deḡhte the, lekin yih waḡt guzar gayā hai.

<sup>17</sup> Chunāñche jo Masīh meñ hai wuh nayā maḡhlūḡ hai. Purāñī zindagī jātī rahī aur nāī zindagī shurū ho gāī hai.

<sup>18</sup> Yih sab kuchh Allāh kī taraf se hai jis ne Masīh ke wasīle se apne sāth hamārā mel-milāp kar liyā hai. Aur usī ne hameñ mel-milāp karāne kī ḡhidmat kī zimmedārī dī hai.

<sup>19</sup> Is ḡhidmat ke taht ham yih paighām sunāte haiñ ki Allāh ne Masīh ke wasīle se apne sāth duniyā kī sulah karāī aur logoñ ke gunāhoñ ko un ke zimme na lagāyā. Sulah karāne kā yih paighām us ne hamāre sapurd kar diyā.

<sup>20</sup> Pas ham Masīh ke elchī haiñ aur Allāh hamāre wasīle se logon ko samjhātā hai. Ham Masīh ke wāste āp se minnat karte haiñ ki Allāh kī sulah kī peshkash ko qabūl karen tāki us kī āp ke sāth sulah ho jāe.

<sup>21</sup> Masīh begunāh thā, lekin Allāh ne use hamārī khātir gunāh thahrāyā tāki hameñ us meñ rāstbāz qarār diyā jāe.

## 6

<sup>1</sup> Allāh ke hamk̄hidmat hote hue ham āp se minnat karte haiñ ki jo fazl āp ko milā hai wuh zāe na jāe.

<sup>2</sup> Kyoñki Allāh farmātā hai, “Qabūliyat ke waqt main ne terī sunī, najāt ke din terī madad kī.” Suneñ! Ab qabūliyat kā waqt ā gayā hai, ab najāt kā din hai.

<sup>3</sup> Ham kisī ke lie bhī thokar kā bāis nahīn bante tāki log hamārī khidmat meñ nuqs na nikāl sakeñ.

<sup>4</sup> Hāñ, hameñ sifārish kī zarūrat hī nahīn, kyoñki Allāh ke khādīm hote hue ham har hālat meñ apnī neknāmī zāhir karte haiñ: jab ham sabar se musibateñ, mushkilāt aur āfateñ bardāsht karte haiñ,

<sup>5</sup> jab log hameñ mārte aur qaid meñ dālte haiñ, jab ham beqābū hujūmon kā sāmna karte haiñ, jab ham mehnat-mashaqqat karte, rāt ke waqt jāgte aur bhūke rahte haiñ,

<sup>6</sup> jab ham apnī pākīzagī, ilm, sabar aur mehrbān sulūk kā izhār karte haiñ, jab ham Rūhul-quds ke wasīle se haqīqī muhabbat rakhte,

<sup>7</sup> sachchī bāteñ karte aur Allāh kī qudrat se logon kī k̄hidmat karte haiñ. Ham apnī neknāmī is meñ bhī zāhir karte haiñ ki ham donoñ hāthon se rāstbāzī ke hathiyār thāme rakhte haiñ.

<sup>8</sup> Ham apnī k̄hidmat jāri rakhte haiñ, chāhe log hamārī izzat karen chāhe be'izzatī, chāhe wuh hamārī burī riport deñ chāhe achchhī. Agarche hamārī k̄hidmat sachchī hai, lekin log hameñ daḡhābāz qarār dete haiñ.

<sup>9</sup> Agarche log hameñ jānte haiñ to bhī hameñ nazarandāz kiyā jātā hai. Ham marte marte zindā rahte haiñ aur log hameñ mār mār kar qatl nahīñ kar sakte.

<sup>10</sup> Ham ḡham khā khā kar har waqt k̄hush rahte haiñ, ham ḡharīb hālat meñ bahuton ko daulatmand banā dete haiñ. Hamāre pās kuchh nahīñ hai, to bhī hameñ sab kuchh hāsīl hai.

<sup>11</sup> Kurinthus ke azīzo, ham ne khul kar āp se bāt kī hai, hamārā dil āp ke lie kushādā ho gayā hai.

<sup>12</sup> Jo jagah ham ne dil meñ āp ko dī hai wuh ab tak kam nahīñ huī. Lekin āp ke dilon meñ hamāre lie koī jagah nahīñ rahī.

<sup>13</sup> Ab main āp se jo mere bachche haiñ darkhāst kartā hūñ ki jawāb meñ hameñ bhī apne dilon meñ jagah deñ.

### *Ḡhairmasīhī Asarāt se K̄habardār*

<sup>14</sup> Ḡhairīmāndāron ke sāth mil kar ek jue tale zindagī na guzāreñ, kyonki rāstī kā nārāstī se kyā wāstā hai? Yā raushnī tārīkī ke sāth kyā tālluq rakh saktī hai?

15 Masīh aur Iblīs ke darmiyān kyā mutābiqat ho saktī hai? Īmāndār kā ḡhairīmāndār ke sāth kyā wāstā hai?

16 Allāh ke maqdis aur buton meñ kyā ittafāq ho saktā hai? Ham to zindā Ḳhudā kā ghar haiñ. Allāh ne yoñ farmāyā hai,

“Maiñ un ke darmiyān sukūnat karūnga aur un meñ phirūnga.

Maiñ un kā Ḳhudā hūngā,  
aur wuh merī qaum hoñge.”

17 Chunāñche Rab farmātā hai,

“Is lie un meñ se nikal āo aur un se alag ho jāo.

Kisī nāpāk chīz ko na chhūnā,  
to phir maiñ tumheñ qabūl karūnga.

18 Maiñ tumhārā Bāp hūngā aur tum mere beṭe-beṭiyāñ hoge,  
Rab Qādir-e-mutlaq farmātā hai.”

## 7

1 Mere azīzo, yih tamām wāde ham se kie gae haiñ. Is lie āeñ, ham apne āp ko har us chīz se pāk-sāf karen jo jism aur rūh ko ālūdā kar detī hai. Aur ham Ḳhudā ke ḡhauf meñ mukammal taur par muqaddas banāne ke lie koshāñ raheñ.

### *Paulus kī Ḳhushī*

2 Hameñ apne dil meñ jagah deñ. Na ham ne kisī se nāinsāfi kī, na kisī ko bigārā yā us se ḡhalat faydā uṭhāyā.

3 Maiñ yih bāt āp ko mujrim ṭhahrāne ke lie nahīñ kah rahā. Maiñ āp ko pahle batā chukā hūñ ki āp hameñ itne azīz haiñ ki ham āp ke sāth marne aur jīne ke lie taiyār haiñ.

<sup>4</sup> Is lie main āp se khul kar bāt kartā hūn aur main āp par baṛā faḡhr bhī kartā hūn. Is nāte se mujhe pūrī tasallī hai, aur hamārī tamām musibatoṅ ke bāwujūd merī ḡhushī kī intahā nahīn.

<sup>5</sup> Kyonki jab ham Makiduniyā pahuṅche to ham jism ke lihāz se ārām na kar sake. Musibatoṅ ne hameṅ har taraf se gher liyā. Dūsroṅ kī taraf se jhagaroṅ se aur dil meṅ tarah tarah ke ḡar se nipaṭnā paṛā.

<sup>6</sup> Lekin Allāh ne jo dabe huon ko tasallī baḡhshtā hai Titus ke āne se hamārī hauslā-afzāī kī.

<sup>7</sup> Hamārā hauslā na sirf us ke āne se baṛh gayā balki un hauslā-afzā bātoṅ se bhī jin se āp ne use tasallī dī. Us ne hameṅ āp kī ārzū, āp kī āh-o-zārī aur mere lie āp kī sargarmī ke bāre meṅ riṇort dī. Yih sun kar merī ḡhushī mazīd baṛh gāī.

<sup>8</sup> Kyonki agarche main ne āp ko apne ḡhat se dukh pahuṅchāyā to bhī main pachhtātā nahīn. Pahle to main ḡhat likhne se pachhtāyā, lekin ab main deḡhtā hūn ki jo dukh us ne āp ko pahuṅchāyā wuh sirf ārizī thā

<sup>9</sup> aur us ne āp ko taubā tak pahuṅchāyā. Yih sun kar main ab ḡhushī manātā hūn, is lie nahīn ki āp ko dukh uṅhānā paṛā hai balki is lie ki is dukh ne āp ko taubā tak pahuṅchāyā. Allāh ne yih dukh apnī marzī pūrī karāne ke lie istemāl kiyā, is lie āp ko hamārī taraf se koī nuḡsān na pahuṅchā.

<sup>10</sup> Kyonki jo dukh Allāh apnī marzī pūrī karāne ke lie istemāl kartā hai us se taubā paidā hotī hai



aur us kā anjām najāt hai. Is meñ pachhtāne kī gunjāish hī nahīn. Is ke baraks duniyāwī dukh kā anjām maut hai.

11 Āp k̄hud dekheñ ki Allāh ke is dukh ne āp meñ kyā paidā kiyā hai: kitnī sanjīdagī, apnā difā karne kā kitnā josh, ḡhalat harkatoñ par kitnā ḡhussā, kitnā k̄hauf, kitnī chāhat, kitnī sargarmī. Āp sazā dene ke lie kitne taiyār the! Āp ne har lihāz se sābit kiyā hai ki āp is muāmale meñ bequsūr haiñ.

12 Ḡharz, agarche maiñ ne āp ko likhā, lekin maqsad yih nahīn thā ki ḡhalat harkateñ karne wālē ke bāre meñ likhūn yā us ke bāre meñ jis ke sāth ḡhalat kām kiyā gayā. Nahīn, maqsad yih thā ki Allāh ke huzūr āp par zāhir ho jāe ki āp hamāre lie kitne sargarm haiñ.

13 Yihī wajah hai ki hamārā hauslā barh gayā hai.

Lekin na sirf hamārī hauslā-afzāi huī hai balki ham yih dekh kar be'intahā k̄hush hue ki Titus kitnā k̄hush thā. Wuh kyon k̄hush thā? Is lie ki us kī rūh āp sab se tar-o-tāzā huī.

14 Us ke sāmne maiñ ne āp par faḡhr kiyā thā, aur maiñ sharmindā nahīn huā kyonki yih bāt durust sābit huī hai. Jis tarah ham ne āp ko hameshā sachchī bāteñ batāi haiñ usī tarah Titus ke sāmne āp par hamārā faḡhr bhī durust niklā.

15 Āp use nihāyat azīz haiñ kyonki wuh āp sab kī farmānbardārī yād kartā hai, ki āp ne ḡarte aur kāñpte hue use k̄hushāmdīd kahā.

16 Maiñ k̄hush hūn ki maiñ har lihāz se āp par etamād kar saktā hūn.

## 8

*Yahūdiyā ke Ġharībōñ ke lie Hadiyā*

<sup>1</sup> Bhāiyō, ham āp kī tawajjuh us fazl kī taraf dilānā chāhte haiñ jo Allāh ne sūbā Makiduniyā kī jamātoñ par kiyā.

<sup>2</sup> Jis musibat meñ wuh phañse hue haiñ us se un kī saḡht āzmāish huī. To bhī un kī be'intahā ḡhushī aur shadīd ḡhurbat kā natījā yih niklā ki unhoñ ne baḡī faiyāzdilī se hadiyā diyā.

<sup>3</sup> Maiñ gawāh hūñ ki jitnā wuh de sake utnā unhoñ ne de diyā balki is se bhī zyādā. Apnī hī taraf se

<sup>4</sup> unhoñ ne bare zor se ham se minnat kī ki hameñ bhī Yahūdiyā ke muḡaddasīn kī ḡhidmat karne kā mauḡā deñ, ham bhī dene ke fazl meñ sharīk honā chāhte haiñ.

<sup>5</sup> Aur unhoñ ne hamārī ummīd se kahīñ zyādā kiyā! Allāh kī marzī se un kā pahlā ḡadam yih thā ki unhoñ ne apne āp ko Ḳhudāwand ke lie maḡhsūs kiyā. Un kā dūsra ḡadam yih thā ki unhoñ ne apne āp ko hamāre lie maḡhsūs kiyā.

<sup>6</sup> Is par ham ne Titus kī hauslā-afzāī kī ki wuh āp ke pās bhī hadiyā jamā karne kā wuh silsilā anjām tak pahuñchāe jo us ne shurū kiyā thā.

<sup>7</sup> Āp ke pās sab kuchh kasrat se pāyā jātā hai, ḡhāh imān ho, ḡhāh kalām, ilm, mukammal sargarmī yā ham se muhabbat ho. Ab is bāt kā ḡhayāl rakheñ ki āp yih hadiyā dene meñ bhī apnī kasīr daulat kā izhār kareñ.

<sup>8</sup> Merī taraf se yih koī hukm nahīñ hai. Lekin dūsroñ kī sargarmī ke pesh-e-nazar maiñ āp kī

bhī muhabbat parakh rahā hūn ki wuh kitnī haqīqī hai.

<sup>9</sup> Āp to jānte haiñ ki hamāre Ḳhudāwand Īsā Masīh ne āp par kaisā fazl kiyā hai, ki agarche wuh daulatmand thā to bhī wuh āp kī ḳhātir ḡharīb ban gayā tāki āp us kī ḡhurbat se daulatmand ban jāeñ.

<sup>10</sup> Is muāmale meñ merā mashwarā sunēñ, kyoñki wuh āp ke lie mufīd sābit hogā. Pichhle sāl āp pahlī jamāt the jo na sirf hadiyā dene lagī balki ise denā bhī chāhtī thī.

<sup>11</sup> Ab use takmīl tak pahuñchāeñ jo āp ne shurū kar rakhā hai. Dene kā jo shauq āp rakhte haiñ wuh amal meñ lāyā jāe. Utnā deñ jitnā āp de sakeñ.

<sup>12</sup> Kyoñki agar āp dene kā shauq rakhte haiñ to phir Allāh āp kā hadiyā us binā par qabūl karegā jo āp de sakte haiñ, us binā par nahīñ jo āp nahīñ de sakte.

<sup>13</sup> Kahne kā matlab yih nahīñ ki dūsroñ ko ārām dilāne ke bāis āp ḳhud musībat meñ paṛ jāeñ. Bāt sirf yih hai ki logoñ ke hālāt kuchh barābar hone chāhieñ.

<sup>14</sup> Is waqt to āp ke pās bahut hai aur āp un kī zarūrat pūrī kar sakte haiñ. Bād meñ kisī waqt jab un ke pās bahut hogā to wuh āp kī zarūrat bhī pūrī kar sakeñge. Yoñ āp ke hālāt kuchh barābar raheñge,

<sup>15</sup> jis tarah kalām-e-muqaddas meñ bhī likhā hai, “Jis ne zyādā jamā kiyā thā us ke pās kuchh na bachā. Lekin jis ne kam jamā kiyā thā us ke pās bhī kāfī thā.”

*Titus aur Us ke Sāthī*

16 **Ḳhudā kā shukr hai jis ne Titus ke dil meñ wuhī josh paidā kiyā hai jo main āp ke lie rakhtā hūñ.**

17 **Jab ham ne us kī hauslā-afzāī kī ki wuh āp ke pās jāe to wuh na sirf is ke lie taiyār huā balki baṛā sargarm ho kar ḳhud baḳhud āp ke pās jāne ke lie rawānā huā.**

18 **Ham ne us ke sāth us bhāī ko bhej diyā jis kī ḳhidmat kī tārif tamām jamāteñ kartī haiñ, kyonki use Allāh kī ḳhushḳhabrī sunāne kī nemat milī hai.**

19 **Use na sirf āp ke pās jānā hai balki jamātoñ ne use muḳarrar kiyā hai ki jab ham hadiye ko Yarūshalam le jāenge to wuh hamāre sāth jāe. Yoñ ham yih ḳhidmat adā karte waqt Ḳhudāwand ko jalāl deñge aur apnī sargarmī kā izhār karenge.**

20 **Kyonki us baṛe hadiye ke pesh-e-nazar jo ham le jāenge ham is se bachnā chāhte haiñ ki kisī ko ham par shak karne kā mauqā mile.**

21 **Hamārī pūrī koshish yih hai ki wuhī kuchh karen jo na sirf Ḳhudāwand kī nazar meñ durust hai balki insān kī nazar meñ bhī.**

22 **Un ke sāth ham ne ek aur bhāī ko bhī bhej diyā jis kī sargarmī ham ne kāī mauqoñ par parkhī hai. Ab wuh mazīd sargarm ho gayā hai, kyonki wuh āp par baṛā etamād kartā hai.**

23 **Jahāñ tak Titus kā tālluḳ hai, wuh merā sāthī aur hamḳhidmat hai. Aur jo bhāī us ke sāth haiñ unheñ jamātoñ ne bhejā hai. Wuh Masīh ke lie izzat kā bāis haiñ.**

24 **Un par apnī muhabbat kā izhār karke yih zāhir karen ki ham āp par kyon faḳhr karte**

haiñ. Phir yih bāt Ḳhudā kī dīgar jamātoñ ko bhī nazar āegī.

## 9

### *Muqaddasīn kī Madad*

<sup>1</sup> Asal meñ is kī zarūrat nahīn ki maiñ āp ko us kām ke bāre meñ likhūn jo hameñ Yahūdiyā ke muqaddasīn kī ḳhidmat meñ karnā hai.

<sup>2</sup> Kyōñki maiñ āp kī garmjoshī jāntā hūñ, aur maiñ Makiduniyā ke īmāndāroñ ke sāmne āp par faḳhr kartā rahā hūñ ki “Aḳhayā ke log pichhle sāl se dene ke lie taiyār the.” Yoñ āp kī sargarmī ne zyādātar logoñ ko ḳhud dene ke lie ubhārā.

<sup>3</sup> Ab maiñ ne in bhāiyōñ ko bhej diyā hai tāki hamārā āp par faḳhr bebuniyād na nikle balki jis tarah maiñ ne kahā thā āp taiyār raheñ.

<sup>4</sup> Aisā na ho ki jab maiñ Makiduniyā ke kuchh bhāiyōñ ko sāth le kar āp ke pās pahuñchūngā to āp taiyār na hūñ. Us waqt maiñ, balki āp bhī sharmindā hoñge ki maiñ ne āp par itnā etamād kiyā hai.

<sup>5</sup> Is lie maiñ ne is bāt par zor denā zarūrī samjhā ki bhāī pahle hī āp ke pās ā kar us hadiye kā intazām kareñ jis kā wādā āp ne kiyā hai. Kyōñki maiñ chāhtā hūñ ki mere āne tak yih hadiyā jamā kiyā gayā ho aur aisā na lage jaisā ise mushkil se āp se nikālnā parā. Is ke bajāe āp kī saḳhāwat zāhir ho jāe.

<sup>6</sup> Yād rahe ki jo shaḳhs bīj ko bachā bachā kar botā hai us kī fasal bhī utnī kam hogī. Lekin jo

bahut bīj botā hai us kī fasal bhī bahut zyādā hogī.

<sup>7</sup> Har ek utnā de jitnā dene ke lie us ne pahle apne dil meñ ṭhahrā liyā hai. Wuh is meñ taklif yā majbūrī mahsūs na kare, kyoñki Allāh us se muhabbat rakhtā hai jo ḡhushī se detā hai.

<sup>8</sup> Aur Allāh is qābil hai ki āp ko āp kī zarūriyāt se kahīn zyādā de. Phir āp ke pās har waqt aur har lihāz se kāfī hogā balki itnā zyādā ki āp har qism kā nek kām kar sakeñge.

<sup>9</sup> Chunāñche kalām-e-muqaddas meñ yih bhī likhā hai, “Us ne faiyāzī se zarūratmandoñ meñ ḡhairāt bikher dī, us kī rāstbāzī hameshā tak qāym rahegī.”

<sup>10</sup> Ḳhudā hī bīj bone wāle ko bīj muhaiyā kartā aur use khāne ke lie roṭī detā hai. Aur wuh āp ko bhī bīj de kar us meñ izāfā karegā aur āp kī rāstbāzī kī fasal ugne degā.

<sup>11</sup> Hāñ, wuh āp ko har lihāz se daulatmand banā degā aur āp har mauqe par faiyāzī se de sakeñge. Chunāñche jab ham āp kā hadiyā un ke pās le jāeñge jo zarūratmand haiñ to wuh Ḳhudā kā shukr kareñge.

<sup>12</sup> Yoñ āp na sirf muqaddasīn kī zarūriyāt pūrī kareñge balki wuh āp kī is ḡhidmat se itne muta'assir ho jāeñge ki wuh baṛe josh se Ḳhudā kā bhī shukriyā adā kareñge.

<sup>13</sup> Āp kī ḡhidmat ke natīje meñ wuh Allāh ko jalāl deñge. Kyoñki āp kī un par aur tamām imāndāroñ par saḡhāwat kā izhār sābit karegā ki āp Masīh kī ḡhushḡhabrī na sirf taslīm karte haiñ balki us ke tābe bhī rahte haiñ.

<sup>14</sup> Aur jab wuh āp ke lie duā kareñge to āp ke

ārzūmand raheᅅge, is lie ki Allāh ne āp ko kitnā baᅇā fazl de diyā hai.

<sup>15</sup> Allāh kā us kī nāqābil-e-bayān baᅇhshish ke lie shukr ho!

## 10

### *Paulus Apnī ᅇhidmat kā Difā Kartā Hai*

<sup>1</sup> Maiᅅ āp se apīl kartā hūᅅ, maiᅅ Paulus jis ke bāre meᅅ kahā jātā hai ki maiᅅ āp ke rūbarū ājiz hotā hūᅅ aur sirf āp se dūr ho kar diler hotā hūᅅ. Masīh kī halīmī aur narmī ke nām meᅅ

<sup>2</sup> maiᅅ āp se minnat kartā hūᅅ ki mujhe āp ke pās ā kar itnī dilerī se un logoᅅ se nīpaᅇnā na paᅇ jo samajhte haiᅅ ki hamārā chāl-chalan duniyāwī hai. Kyoᅅki filhāl aisā lagtā hai ki is kī zarūrāt hogī.

<sup>3</sup> Beshak ham insān hī haiᅅ, lekin ham duniyā kī tarah jang nahīᅅ laᅇte.

<sup>4</sup> Aur jo hathiyār ham is jang meᅅ istemāl karte haiᅅ wuh is duniyā ke nahīᅅ haiᅅ, balki unheᅅ Allāh kī taraf se qīle ᅇhā dene kī quwwat hāsil hai. In se ham ᅇhalat ᅇhayālāt ke ᅇhāᅅche

<sup>5</sup> aur har ūᅅchī chīz ᅇhā dete haiᅅ jo Allāh ke ilm-o-irfān ke ᅇhilāf kharī ho jātī hai. Aur ham har ᅇhayāl ko qaid karke Masīh ke tābe kar dete haiᅅ.

<sup>6</sup> Hāᅅ, āp ke pūre taur par tābe ho jāᅅe par ham har nāfarmānī kī sazā dene ke lie taiyār hoᅅge.

<sup>7</sup> Ap sirf zāhirī bātoᅅ par ᅇhaur kar rahe haiᅅ. Agar kisī ko is bāt kā etamād ho ki wuh Masīh kā hai to wuh is kā bhī ᅇhayāl kare ki ham bhī usī kī tarah Masīh ke haiᅅ.

<sup>8</sup> Kyoñki agar main us iḳhtiyār par mazīd faḳhr bhī karūn jo Ḳhudāwand ne hameñ diyā hai to bhī main sharmindā nahīn hūngā. Ġhaur kareñ ki us ne hameñ āp ko dhā dene kā nahīn balki āp kī ruhānī tāmīr karne kā iḳhtiyār diyā hai.

<sup>9</sup> Main nahīn chāhtā ki aisā lage jaise main āp ko apne ḳhaton se ḍarāne kī koshish kar rahā hūñ.

<sup>10</sup> Kyoñki bāz kahte haiñ, “Paulus ke ḳhat zordār aur zabardast haiñ, lekin jab wuh ḳhud hāzir hotā hai to wuh kamzor aur us ke bolne kā tarz hiḳāratāmez hai.”

<sup>11</sup> Aise log is bāt kā ḳhayāl kareñ ki jo bāteñ ham āp se dūr hote hue apne ḳhaton meñ pesh karte haiñ unhīn bāton par ham amal kareñge jab āp ke pās āeñge.

<sup>12</sup> Ham to apne āp ko un meñ shumār nahīn karte jo apnī tārīf karke apnī sifārish karte rahte haiñ, na apnā un ke sāth muwāzanā karte haiñ. Wuh kitne besamajh haiñ jab wuh apne āp ko meyār banā kar usī par apne āp ko jāñchte haiñ aur apnā muwāzanā apne āp se karte haiñ.

<sup>13</sup> Lekin ham munāsib had se zyādā faḳhr nahīn kareñge balki sirf us had tak jo Allāh ne hamāre lie muḳarrar kiyā hai. Aur āp bhī is had ke andar ā jāte haiñ.

<sup>14</sup> Is meñ ham munāsib had se zyādā faḳhr nahīn kar rahe, kyoñki ham to Masīh kī ḳhushḳhabrī le kar āp tak pahuñch gae haiñ. Agar aisā na hotā to phir aur bāt hotī.

<sup>15</sup> Ham aise kām par faḳhr nahīn karte jo dūsron kī mehnat se saranjām diyā gayā hai. Is



meñ bhī ham munāsib haddoñ ke andar rahte haiñ, balki ham yih ummīd rakhte haiñ ki āp kā īmān baṛh jāe aur yoñ hamārī qadar-o-qīmat bhī Allāh kī muqarrarā had tak baṛh jāe. Kḥudā kare ki āp meñ hamārā yih kām itnā baṛh jāe

<sup>16</sup> ki ham Allāh kī kḥushkhabrī āp se āge jā kar bhī sunā sakeñ. Kyoñki ham us kām par faḥr nahīn karnā chāhte jise dūsre kar chuke haiñ.

<sup>17</sup> Kalām-e-muqaddas meñ likhā hai, “Faḥr karne wālā Kḥudāwand hī par faḥr kare.”

<sup>18</sup> Jab log apnī tārif karke apnī sifārish karte haiñ to is meñ kyā hai! Is se wuh sahīh sābit nahīn hote, balki aham bāt yih hai ki Kḥudāwand hī is kī tasdīq kare.

## 11

### *Paulus aur Jhūṭe Rasūl*

<sup>1</sup> Kḥudā kare ki jab main apnī hamāqat kā kuchh izhār kartā hūñ to āp mujhe bardāsht karen. Hāñ, zarūr mujhe bardāsht karen,

<sup>2</sup> kyoñki main āp ke lie Allāh kī-sī ghairat rakhtā hūñ. Main ne āp kā rishtā ek hī mard ke sāth bāndhā, aur main āp ko pākdāman kuñwārī kī haisiyat se us mard Masīh ke huzūr pesh karnā chāhtā thā.

<sup>3</sup> Lekin afsos, mujhe dar hai ki āp Hawwā kī tarah gunāh meñ gir jāenge, ki jis tarah sānp ne apnī chālākī se Hawwā ko dhokā diyā usī tarah āp kī soch bhī bigaṛ jāegī aur wuh kḥulūdili aur pāk lagan khatm ho jāegī jo āp Masīh ke lie mahsūs karte haiñ.

<sup>4</sup> Kyoñki āp kḥushī se har ek ko bardāsht karte haiñ jo āp ke pās ā kar ek farq qism kā Isā

pesh kartā hai, ek aisā Īsā jo ham ne āp ko pesh nahīn kiyā thā. Aur āp ek aisī rūh aur aisī “Ḳhushḱhabrī” qabūl karte haiñ jo us Rūh aur ḱhushḱhabrī se bilkul farq hai jo āp ko ham se milī thī.

<sup>5</sup> Merā nahīn ḱhayāl ki maiñ in nām-nihād ‘ḱhās’ rasūloñ kī nisbat kam hūñ.

<sup>6</sup> Ho saktā hai ki maiñ bolne meñ māhir nahīn hūñ, lekin yih mere ilm ke bāre meñ nahīn kahā jā saktā. Yih ham ne āp ko sāf sāf aur har lihāz se dikhāyā hai.

<sup>7</sup> Maiñ ne Allāh kī ḱhushḱhabrī sunāne ke lie āp se koī bhī muāwazā na liyā. Yoñ maiñ ne apne āp ko nīchā kar diyā tāki āp ko sarfarāz kar diyā jāe. Kyā is meñ mujh se ḡhaltī huī?

<sup>8</sup> Jab maiñ āp kī ḱhidmat kar rahā thā to mujhe Ḳhudā kī dīgar jamātoñ se paise mil rahe the, yāñī āp kī madad karne ke lie maiñ unheñ lūṭ rahā thā.

<sup>9</sup> Aur jab maiñ āp ke pās thā aur zarūratmand thā to maiñ kisī par bojh na banā, kyonki jo bhāī Makiduniyā se āe unhoñ ne merī zarūriyāt pūrī kīñ. Māzī meñ maiñ āp par bojh na banā aur āindā bhī nahīn banūngā.

<sup>10</sup> Masīh kī us sachchāī kī qasam jo mere andar hai, Aḱhayā ke pūre sūbe meñ koī mujhe is par faḱhr karne se nahīn rokegā.

<sup>11</sup> Maiñ yih kyon kah rahā hūñ? Is lie ki maiñ āp se muhabbat nahīn rakhtā? Ḳhudā hī jāntā hai ki maiñ āp se muhabbat rakhtā hūñ.

<sup>12</sup> Aur jo kuchh maiñ ab kar rahā hūñ wuhī kartā rahūngā, tāki maiñ nām-nihād rasūloñ ko wuh mauḡā na dūñ jo wuh ḡhūñḡ rahe haiñ.

Kyoṅki yihī un kā maqsad hai ki wuh faḡhr karke yih kah sakeṅ ki wuh ham jaise haiṅ.

<sup>13</sup> Aise log to jhūṭe rasūl haiṅ, dhokebāz mazdūr jinhoṅ ne Masīh ke rasūloṅ kā rūp dhār liyā hai.

<sup>14</sup> Aur kyā aḡab, kyoṅki Iblīs bhī nūr ke farishte kā rūp dhār kar ghūmtā-phirtā hai.

<sup>15</sup> To phir yih baṛī bāt nahīṅ ki us ke chele rāstbāzī ke ḡhādim kā rūp dhār kar ghūmte-phirte haiṅ. Un kā anjām un ke āmāl ke mutābiq hī hogā.

### *Rasūl Hone kī Wajah se Paulus kī Īzārasānī*

<sup>16</sup> Maiṅ dubārā kahtā hūṅ ki koī mujhe ahmaq na samjhe. Lekin agar āp yih socheṅ bhī to kam az kam mujhe ahmaq kī haisiyat se qabūl karenṅ tāki maiṅ bhī thoṛā-bahut apne āp par faḡhr karūṅ.

<sup>17</sup> Asal meṅ jo kuchh maiṅ ab bayān kar rahā hūṅ wuh Ḡhudāwand ko pasand nahīṅ hai, balki maiṅ ahmaq kī tarah bāt kar rahā hūṅ.

<sup>18</sup> Lekin chūṅki itne log jismānī taur par faḡhr kar rahe haiṅ is lie maiṅ bhī faḡhr karūṅga.

<sup>19</sup> Beshak āp ḡhud itne dānishmand haiṅ ki āp ahmaqoṅ ko ḡhushī se bardāsht karte haiṅ.

<sup>20</sup> Hāṅ, balki āp yih bhī bardāsht karte haiṅ jab log āp ko ḡhulām banāte, āp ko lūṭte, āp se ḡhalat fāydā uṭhāte, naḡhre karte aur āp ko thappaṛ mārte haiṅ.

<sup>21</sup> Yih kah kar mujhe sharm ātī hai ki ham itne kamzor the ki ham aisā na kar sake.

Lekin agar koī kisī bāt par fakhr karne kī jurrat kare (maiñ ahmaq kī-sī bāt kar rahā hūñ) to maiñ bhī utnī hī jurrat karūnga.

<sup>22</sup> Kyā wuh Ibrānī haiñ? Maiñ bhī hūñ. Kyā wuh Isrāīlī haiñ? Maiñ bhī hūñ. Kyā wuh Ibrāhīm kī aulād haiñ? Maiñ bhī hūñ.

<sup>23</sup> Kyā wuh Masīh ke kḥādim haiñ? (Ab to maiñ goyā beḥhud ho gayā hūñ ki is tarah kī bāteñ kar rahā hūñ!) Maiñ un se zyādā Masīh kī kḥidmat kartā hūñ. Maiñ ne un se kahīñ zyādā mehnat-mashaqqat kī, zyādā dafā jel meñ rahā, mere zyādā saḥtī se koṛe lagāe gae aur maiñ bār bār marne ke kḥatroñ meñ rahā hūñ.

<sup>24</sup> Mujhe Yahūdiyoñ se pañch dafā 39 koṛoñ kī sazā milī hai.

<sup>25</sup> Tīn dafā Romiyoñ ne mujhe lāṭhī se mārā. Ek bār mujhe sangsār kiyā gayā. Jab maiñ samundar meñ safr kar rahā thā to tīn martabā merā jahāz tabāh huā. Hāñ, ek dafā mujhe jahāz ke tabāh hone par ek pūrī rāt aur din samundar meñ guzārnā paṛā.

<sup>26</sup> Mere beshumār safroñ ke daurān mujhe kāi tarah ke kḥatroñ kā sāmna karnā paṛā, dariyāoñ aur dākuoñ kā kḥatrā, apne hamwatanōñ aur Ġhairyahūdiyoñ ke hamloñ kā kḥatrā. Jahāñ bhī maiñ gayā hūñ wahāñ yih kḥatre maujūd rahe, kḥāh maiñ shahr meñ thā, kḥāh ġhairābād ilāqe meñ yā samundar meñ. Jhūṭe bhāiyoñ kī taraf se bhī kḥatre rahe haiñ.

<sup>27</sup> Maiñ ne jāñfishānī se saḥt mehnat-mashaqqat kī hai aur kāi rāt jāgtā rahā hūñ, maiñ bhūkā aur pyāsā rahā hūñ, maiñ ne bahut roze rakhe haiñ. Mujhe sardī aur nangepan kā

tajrabā huā hai.

<sup>28</sup> Aur yih un fikron ke alāwā hai jo main̄ Ḳhudā kī tamām jamāton ke lie mahsūs kartā hūn̄ aur jo mujhe dabātī rahtī haiñ.

<sup>29</sup> Jab koī kamzor hai to main̄ apne āp ko bhī kamzor mahsūs kartā hūn̄. Jab kisī ko ḡhalat rāh par lāyā jātā hai to main̄ us ke lie shadīd ranjish mahsūs kartā hūn̄.

<sup>30</sup> Agar mujhe faḡhr karnā paṛe to main̄ un chīzon par faḡhr karūnga jo merī kamzor hālat zāhir kartī haiñ.

<sup>31</sup> Hamārā Ḳhudā aur Ḳhudāwand Īsā kā Bāp (us kī hamd-o-sanā abad tak ho) jāntā hai ki main̄ jhūṭ nahīn bol rahā.

<sup>32</sup> Jab main̄ Damishq Shahr meñ thā to bādshāh Aritās ke gawarnar ne shahr ke tamām darwāzon par apne pahredār muqarrar kie tāki wuh mujhe giriftār karen̄.

<sup>33</sup> Lekin shahr kī fasīl meñ ek darīchā thā, aur mujhe ek ṭokre meñ rakh kar wahān se utārā gayā. Yon̄ main̄ us ke hāthon se bach niklā.

## 12

### *Paulus par Kāi Bāton̄ kā Inkishāf*

<sup>1</sup> Lāzim hai ki main̄ kuchh aur faḡhr karūn̄. Agarche is kā koī faydā nahīn, lekin ab main̄ un royāon̄ aur inkishāfāt kā zikr karūnga jo Ḳhudāwand ne mujh par zāhir kie.

<sup>2</sup> Main̄ Masīh meñ ek ādmī ko jāntā hūn̄ jise chaudah sāl hue chhīn kar tīsre āsmān tak pahuñchāyā gayā. Mujhe nahīn patā ki use yih tajrabā jism meñ yā is ke bāhar huā. Ḳhudā jāntā hai.

<sup>3</sup> Hān, Ḳhudā hī jāntā hai ki wuh jism meñ thā yā nahīn. Lekin yih maiñ jāntā hūn

<sup>4</sup> ki use chhīn kar firdaus meñ lāyā gayā jahān us ne nāqābil-e-bayān bāteñ sunīn, aisī bāteñ jin kā zikr karnā insān ke lie rawā nahīn.

<sup>5</sup> Is qism ke ādmī par maiñ faḵhr karūnga, lekin apne āp par nahīn. Maiñ sirf un bātoñ par faḵhr karūnga jo merī kamzor hālat ko zāhir kartī haiñ.

<sup>6</sup> Agar maiñ faḵhr karnā chāhtā to is meñ ahmaq na hotā, kyoñki maiñ haqīqat bayān kartā. Lekin maiñ yih nahīn karūnga, kyoñki maiñ chāhtā hūn ki sab kī mere bāre meñ rāy sirf us par munhasir ho jo maiñ kartā yā bayān kartā hūn. Koī mujhe is se zyādā na samjhe.

<sup>7</sup> Lekin mujhe in ālā inkishāfāt kī wajah se ek kāñṭā chubho diyā gayā, ek taklīfdeh chīz jo mere jism meñ dhañsī rahtī hai tāki maiñ phūl na jāūn. Iblīs kā yih paighambar mere mukke mārṭā rahtā hai tāki maiñ maḡhrūr na ho jāūn.

<sup>8</sup> Tīn bār maiñ ne Ḳhudāwand se iltijā kī ki wuh ise mujh se dūr kare.

<sup>9</sup> Lekin us ne mujhe yihī jawāb diyā, “Merā fazl tere lie kāfī hai, kyoñki merī qudrat kā pūrā izhār terī kamzor hālat hī meñ hotā hai.” Is lie maiñ mazīd ḡhushī se apnī kamzoriyon par faḵhr karūnga tāki Masīh kī qudrat mujh par ṭhahrī rahe.

<sup>10</sup> Yihī wajah hai ki maiñ Masīh kī ḡhātīr kamzoriyon, ḡāliyon, majbūriyon, izārasāniyon aur pareshāniyon meñ ḡhush hūn, kyoñki jab maiñ kamzor hotā hūn tab hī maiñ tāqatwar hotā hūn.

*Paulus kī Kurinthyoñ ke lie Fikr*

11 Maiñ bewuqūf ban gayā hūñ, lekin āp ne mujhe majbūr kar diyā hai. Chāhie thā ki āp hī dūsroñ ke sāmne mere haq meñ bāt karte. Kyonki beshak maiñ kuchh bhī nahīn hūñ, lekin in nām-nihād kḥās rasūloñ ke muqābale meñ maiñ kisī bhī lihāz se kam nahīn hūñ.

12 Jo muta'addid ilāhī nishān, mojize aur zabardast kām mere wasīle se hue wuh sābit karte haiñ ki maiñ rasūl hūñ. Hāñ, wuh baṛī sābitqadmī se āp ke darmiyān kie gae.

13 Jo kḥidmat maiñ ne āp ke darmiyān kī, kyā wuh Kḥudā kī dīgar jamātoñ meñ merī kḥidmat kī nisbat kam thī? Hargiz nahīn! Is meñ farq sirf yih thā ki maiñ āp ke lie mālī bojh na banā. Mujhe muāf kareñ agar mujh se is meñ ḡhaltī huī hai.

14 Ab maiñ tīsrī bār āp ke pās āne ke lie taiyār hūñ. Is martabā bhī maiñ āp ke lie bojh kā bāis nahīn banūngā, kyonki maiñ āp kā māl nahīn balki āp hī ko chāhtā hūñ. Ākḥir bachchoñ ko māñ-bāp kī madad ke lie māl jamā nahīn karnā chāhie balki māñ-bāp ko bachchoñ ke lie.

15 Maiñ to baṛī kḥushī se āp ke lie har kḥarchā uṭhā lūngā balki apne āp ko bhī kḥarch kar dūngā. Kyā āp mujhe kam pyār kareñge agar maiñ āp se zyādā muhabbat rakhūñ?

16 Ṭhīk hai, maiñ āp ke lie bojh na banā. Lekin bāz sochte haiñ ki maiñ chālāk hūñ aur āp ko dhoke se apne jāl meñ phaṅsā liyā.

17 Kis tarah? Jin logoñ ko maiñ ne āp ke pās bhejā kyā maiñ ne un meñ se kisī ke zariye āp se ḡhalat fāydā uṭhāyā?

18 Main ne Titus kī hauslā-afzāī kī ki wuh āp ke pās jāe aur dūsre bhāī ko bhī sāth bhej diyā. Kyā Titus ne āp se ḡhalat fāydā uṭhāyā? Hargiz nahīn! Kyonki ham donoñ ek hī rūh meñ ek hī rāh par chalte haiñ.

19 Āp kāfī der se soch rahe hoñge ki ham āp ke sāmne apnā difā kar rahe haiñ. Lekin aisā nahīn hai balki ham Masīh meñ hote hue Allāh ke huzūr hī yih kuchh bayān kar rahe haiñ. Aur mere azīzo, jo kuchh bhī ham karte haiñ ham āp kī tāmīr karne ke lie karte haiñ.

20 Mujhe ḡar hai ki jab main āūñgā to na āp kī hālat mujhe pasand āegī, na merī hālat āp ko. Mujhe ḡar hai ki āp meñ jhagarā, hasad, ḡhussā, ḡhudḡharzī, buhtān, gapbāzī, ḡhurūr aur betartībī pāī jāegī.

21 Hāñ, mujhe ḡar hai ki aglī dafā jab āūñgā to Allāh mujhe āp ke sāmne nīchā dikhāegā, aur main un bahutoñ ke lie ḡham khāūñgā jinhoñ ne māzī meñ gunāh karke ab tak apnī nāpākī, zinākārī aur aiyāshī se taubā nahīn kī.

## 13

### *Ākhirī Tambīh aur Salām*

1 Ab main tīsri dafā āp ke pās ā rahā hūñ. Kalām-e-muḡaddas ke mutābiq lāzim hai ki har ilzām kī tasdīq do yā tīn gawāhoñ se kī jāe.

2 Jab main dūsri dafā āp ke pās āyā thā to main ne pahle se āp ko āgāh kiyā thā. Ab main āp se dūr yih bāt dubārā kahtā hūñ ki jab main wāpas āūñgā to na wuh bacheñge jinhoñ ne pahle gunāh kiyā thā na dīgar log.



<sup>3</sup> Jo bhī sabūt āp māṅg rahe haiñ ki Masīh mere zariye boltā hai wuh main āp ko dūngā. Āp ke sāth sulūk meñ Masīh kamzor nahīñ hai. Nahīñ, wuh āp ke darmiyān hī apnī quwwat kā izhār kartā hai.

<sup>4</sup> Kyonki agarche use kamzor hālat meñ maslūb kiyā gayā, lekin ab wuh Allāh kī qudrat se zindā hai. Isī tarah ham bhī us meñ kamzor haiñ, lekin Allāh kī qudrat se ham āp kī k̄hidmat karte waqt us ke sāth zindā haiñ.

<sup>5</sup> Apne āp ko jāñch kar mālūm karen ki kyā āp kā īmān qāym hai? K̄hud apne āp ko parkheñ. Kyā āp nahīñ jānte ki Īsā Masīh āp meñ hai? Agar nahīñ to is kā matlab hotā ki āp kā īmān nāmaqbul sābit hotā.

<sup>6</sup> Lekin mujhe ummīd hai ki āp itnā pahchān leñge ki jahāñ tak hamārā tālluq hai ham nāmaqbul sābit nahīñ hue haiñ.

<sup>7</sup> Ham Allāh se duā karte haiñ ki āp se koī ghaltī na ho jāe. Bāt yih nahīñ ki logoñ ke sāmne ham sahīh nikleñ balki yih ki āp sahīh kām karen, chāhe log hameñ k̄hud nākām kyon na qarār den.

<sup>8</sup> Kyonki ham haqīqat ke k̄hilāf khare nahīñ ho sakte balki sirf us ke haq meñ.

<sup>9</sup> Ham k̄hush haiñ jab āp tāqatwar haiñ go ham k̄hud kamzor haiñ. Aur hamārī duā yih hai ki āp kāmīl ho jāeñ.

<sup>10</sup> Yihī wajah hai ki main āp se dūr rah kar likhtā hūñ. Phir jab main āūngā to mujhe apnā ikhtiyār istemāl karke āp par sahtī nahīñ karnī paregī. Kyonki K̄hudāwand ne mujhe yih ikhtiyār āp ko dhā dene ke lie nahīñ balki āp ko

tāmīr karne ke lie diyā hai.

<sup>11</sup> Bhāiyo, ākhir meñ main āp ko salām kahtā hūñ. Sudhar jāeñ, ek dūsre kī hauslā-afzāi karēñ, ek hī soch rakheñ aur sulah-salāmatī ke sāth zindagī guzāreñ. Phir muhabbat aur salāmatī kā Ḳhudā āp ke sāth hogā.

<sup>12</sup> Ek dūsre ko muḡaddas bosā denā. Tamām muḡaddasīn āp ko salām kahte haiñ.

<sup>13</sup> Ḳhudāwand Īsā Masīh kā fazl, Allāh kī muhabbat aur Rūhul-quds kī rifāqat āp sab ke sāth hotī rahe.

**Kitab-i Muqaddas**  
**The Holy Bible in Urdu, Urdu Geo Version, Roman**  
**Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2024-09-20

---

PDF generated using Haiola and XeLaTeX on 15 May 2025 from source files dated 15 May 2025

123ff8cb-27b3-5817-a02a-22e67145fd30